

24.2.2017
quotidiana

Il giavisch da sgular cun il ristg da crudar

Ivo Zen preschenta il film «Zaunkönig» davart amicizia ed ils desideris dad ina generaziun

■ (anr/ac) Cun il film documentar «Zaunkönig» raquinta il cineast rumantsch Ivo Zen l'istorgia da ses ami Martin e dad el sez a la sava da l'esser creschì. Ina istorgia dad ina generaziun creschida si en ils onns novanta e dals desideris da la giuventetgna da sgular pli aut ch'ìls auters cun il ristg da crudar. «Martin era mes ami, el è mort giuven en consequenza dal consum da drogas, el ha bittà davent sia vita, jau viver. La caussa para clera. Enfin che jau hai ratschavì il diari da Martin.» Quai scriva il cineast Ivo Zen en connex cun ses nov film documentar che vegn bainprest preschentà en il kino. La documentaziun cineasta da la vita da Martin è parzialmain era l'istorgia dal reschissur Zen. El ha lavurà cun scenas da film da super 8 da l'agen archiv e collià quellas scenas cun extracts dal diari da ses ami Martin Felix. Amis e perditgas dal temp prelegian parts dal diari da Martin uschia ch'il passà sa lia cun il contemporan. Ina intima invista en la vita da Martin mort en la vegliadetgna da 34 onns en consequenza dal consum da drogas. Martin ha celebrà excessiv ses consum da drogas e descrit sia optica da la vita en in diari, fertant che ses ami Ivo ha filmà. Scriver e filmar eran ina impurtanta part da lur giuventetgna. Ina giuventetgna creschida si durant ils onns novanta e sco bleras autras generaziuns da giuventetgna cun il desideris da retschaiver dapli da la vita e cun il giavisch da rumper or. La midada da la giuventetgna en la vita dils creschids n'era betg sulet cumbinada cun speranza, ma bain era cun temas. L'ovra cineasta da



«El è mort e jau viver, la chaussa para clera.» Cun Zaunkönig documentescha Ivo Zen ina amicizia e l'istorgia dad ina generaziun.

MAD

Zen è dapli che sulet ina documentaziun da la vita da ses ami Martin Felix. Ella è ina cronica dad ina part da l'atgna giuventetgna dal reschissur e da sia generaziun. Ina generaziun inserida tranter bainstar ed urden cun il giavisch da resister e nua che l'atgna destrucziun posseda insatge carmalant. Il film è proximamain da vesair en ils kinos.

Engaschi per il film rumantsch

Ivo Zen è creschì si a Sta. Maria en la Val Müstair. Cun 15 onns ha el bandunà la Val per frequentar la scola chantunala a Cuira. Suenter la matura ed in onn intermediar selvadi, sco i stat scrit en ses extract biografic, ha Zen studegià dus onns architettura a la Scola auta tecni-

ca a Turitg. Là ha el chattà la fotografia ed il video per agen diever, ha lavurà en ina libreria e cumenzà a realisar films experimentals. Ses diari ha Zenn scrit cun ina camera da super 8. L'onn 2003 ha el fatg in diplom a la Ecole Supérieure des Beaux Arts e Genevra en la partiziun da film e video. Cun ulteriurs cineasts e cineastas ha el fundà ina structura da produziun independenta e tranter auter s'engascha Zen per il film rumantsch e quai sco president da la Cuminanza d'interess cineasts independents rumantschs. Zen è maridà e viva cun sia famiglia a Turitg. Ils 3 da favrer mussa il Cinema Sil Plaz a Glion il film documentar «Zaunkönig» en preschientscha dal reschissur.